

Gálatas anuabu Paulõ hatu kene bumanikiaki

GÁLATAS

Paulõ hatukiri xinānikiaki, na hātxarā

1 ¹ Jesusū tsuma kuxipaya betsa earā, ē Pauloki. Hawa hunibū hatū xinānē katushū ea yunuama inibuki. Hakia katukinā, Jesus tenābu hatū bestēwani hawē Epa Deus inū ha kayabis Jesusū hamebi ea katunishū ea yunukubaīmisbuki. ² Na nenu hiweshū dasibi nukū betsabu Jesus ikūwaībubetā hari Galácia mai pakea mae tibi anu mā dasibi nukū betsabu itxamisbu tibi anua ē matu kene bumai uīkubaūshākāwē. ³ Ē kene uītā mā haskaya mā unānuma hiweaibū Epa Deus inū nukū Shanē Ibu Jesus Cristo matuwē nuikī hatū pepawē hau matu duawakubainūbūwē. ⁴ Haskakē nukū Epa Deusū haska xinaī keskawē nuku ikirā, natiā hiweabū txakabuhaira wakubainaibube hau nuku kupiyamashanū haskawē taea Jesus Cristo mawai hawē hiwea yauxiama nukū txakabu buanū ika iniki. ⁵ Haskakē nukū Epa Deus kuxipa hau kēwākubainūbūwē. Haskakirā.

Deuskiri yusīa meketi betsa hayamakiaki, na hātxarā

⁶ Cristo nuikipa pepawē taeshū Deusū matu katukī unāmabianiwē taea kanekī hawaira henei yusīa betsaki maekī mā harakiri ea xinātima kayawai e ikī ē nīkaii. ⁷ Txanima ē matu yuiiai. Yusīa betsa naeshuma kuxipa hayama keskawē matu yusīkanikiki. Huni betsabu humepakī matu parākī Cristō matu mekeakiri kakape betsa wakī habias hātxawē matu yusīabumaki. Hatū yusīa hātxarā, hamē haki beparamekanikiki. ⁸ Haskakē tsuāra yusīa betsa nū matu yusī taewani keskama beshū matu yusīaīburā, Deusū yupukī kupiti wani anu bunū ika ikanikiki. Haratura xināma ea kasmai naiuria Deusū nai tsuma hua hatū hātxawē txanitxakayuarā, hawa hatu nīkayamakubaīshākāwē. ⁹ Ha dukū ē

matu yuitani keska na habiatiã ana ã matu yuiai: “Tsuabũra yusãa betsa, hawara mã ikũwãni keskama, habũ matu yusĩkĩ parãkĩ matu betsa wakĩ itxakawaiburã, Deusũ hatu yupukĩ hatu kupiti wani anũ hau meshanũbũwẽ”, iwanã, ã matu ana keneshunaii. ¹⁰Matũmebi xinã pewakãwẽ. Tsua ã benimawaimẽkainã? Ea ikirã, yurabu ã datã akĩ kẽwãmakatsi ikamaki. Hakia Deus besti datã akĩ ã hatu kẽwãmakatsi ikaii, yurabũ hau ea kẽwãnũ hatu abumairã. Haska abuaibu keska ã hatubetã pewakeanaii. Hatubetã haska akirã, ã Cristõ tsuma ikeanamaki.

Paulo eska ibiani Jesusũ kuxipaya inikiaki, na hãtxarã

¹¹Ë betsabu inũ ã puibuũ, matunã, nĩkairakãwẽ. Deusũ yusĩni Jesus mekenãkiri kaka wakĩ datã akĩ ã matu yuikubainirã, yurabũ ea hawa tapĩmama inibuki. ¹²Hakia hunibũ katutã ea yusĩabumabiakẽ Jesus Cristo bestitũ ibubis hawẽ meketi shabakabi ea unãmaniki. ¹³Haskati dabanẽ ã Israelĩ babawẽ taeshũ judeubũ beya dasibi txibãkubaĩkĩ Jesus ikũwaĩbu bari betsatiã ã hatu itxakahairawakĩ ã hatu yamawakĩ keyukatsis ikai mã ekiri nĩkanibuki.

¹⁴Earã, tsua haskamabiakẽ ã shenipabũ beya txibãhairakĩ huni ewai unãnepakĩ betsabu ea keskabu ã hatu binuhairakubainiki. ¹⁵⁻¹⁶Hamẽ judeubumari hau Deusũ hatu kupiyamashanũ nukũ mekenã Messiasikiri eã ã hatu yusĩkubaũshanũ ã kaĩriamabiakẽ bebũkiri Deusũ ea katuniki. Hanua hawẽ pepawẽ ewẽ nuikĩ ma ã huni ewa ea unãmakĩ ana shabakabi ea katushũ hawẽ bakẽ daya ã ashũkubaĩshanũ ea kenashũ hawẽ bake ea unãmaniki. Hanushũ hawẽ merabewati hãtxa hau tsuãra ea yusĩnũ yura betsa ã hawa yukama iniki. ¹⁷Ha inũ, Jerusalém anu dikabi Jesusũ kuxipayabube dukũ ã hãtxai kayuama iniki. Hakia Damasco mae ewapa leste bari huaikiri Arãbia mai pakea anu ã katanima haria Damasco anu ã ana txĩtũkiraniki. ¹⁸Ë Jesus Cristo ikũwãkĩ taewabainima harishũ ano dabe inun besti nitxĩtã Damasco anu txĩtũkirã Pedro uĩnũ ika Jerusalém anu ã ka 15 shaba besti haki bakĩ daewakĩ unãti wai ã habe hiweyuniki. ¹⁹Hakia Jesusũ kuxipaya betsabu uĩyama nukũ Shanẽ Ibũ betsa Tiago besti ã uĩrianiki. ²⁰Deusũ ã xinã txanima unãyã ã matu keneshũkĩ yuiairã, txanimaki.

²¹Pedro uĩxina hanua kai mai pakea dabe Sírĩa inũ Cilícia anu ã kakẽ ²²hakia Judéia mai pakea anushũ ikũwaĩbu nukũ puibu inũ nukũ betsabũ ea uĩsmabia ²³tsuãra nĩkashũ hatu yuikĩ: “Paulõ nuku itxakawakubainitũ Jesusũ kakape yamawapaiaya Deus hawẽ nuikĩ huĩti benawaima ikis hawẽ kakape dasibibu yusĩkubaunikiaki”, iwanã, ekiri nĩkakĩ ²⁴ewẽ taeshũ Deus kẽwãkubainibukiaki.

Paulo Jesusũ kuxipaya betsa inikiaki, na hãtxarã

2 ¹Hanua ma 14 ano binukainaya txipu Jerusalém anu ana kakĩ Barnabébetã Tito ã iyuniki. ²Haskakaini kairã, ã xinãnẽma

Deusū haska ea unāmaya ē kaniki. Jerusalém anu Jesusū kuxipayabu yununikabube hatube besti itxatā haska hatumaki Jesuskiri kakape judeubumakiri kashū ē hatu yusītāmis ē kanemismēkaī ika datebetanā ē hatuki txaniniki, hau ea nīkatā unānūbunā. ³Haska ē hātxa danāma inū betsarā, Tito Gregonawabiakē uībiakī hau hawē hina kubitxi meshtenūbū hawa nuku yunuama irianibuki. ⁴⁻⁵Hanua betsarā, nū itxanu nukū betsabu hatiri nukubetā ikūwaī kayabibumari hune nuku unāti wanū ika hikia manishū nīkakī hawama Jesus Cristokiri nīkatā txibaī ma mekei pepabiaibū hanua habū Moisés hatu yusīni hatū beya nuku ana husimakī txibāmanū ika ikaibū hawa hatu nīkama binumakī ha Jesuskiri hātxa txanimawē taea hawa beya tibiwē husikī matukiri nuku kanemama inibuki, mā haska betsatā maetirubumakirirā.

⁶Jesusū tsumabu unānepabu habu hatu nīkamisbu shanē ibubiabū habū hawa hātxa bena betsa ea yuiama inibuki. Hakia txanima bemakis nū hatu uīkī xinākī kēwābiamiskē haska Deusū bemakisa xinākī unāti waismaki. Haska katukinā, hatū huīti uke merā uīmishwē taea haskawē ē nuiamaki. ⁷Haskawē taea ha beya dabekiri nū unātīnānibuki. Haska Jesuskiri kakape nū hatu pe yusīnūbū Deusū nuku yununiki, ea nitxīkī yunukinā. Judeubuma anu kashū Jesus mekenākiri ē hatu tapīmanū bebūkiri ea unāmaniki. Habiaskari wakī Jesusū Pedrori judeubu anu yunukī nitxīrianiki, hau hakiriri hatu unāmakubainunā, hawē mekeakirirā. Nū haska dayamis nuku nīkakī nukū shanē ibubū nuku unānibuki. ⁸Deusū bake Jesusū Pedro katushū yunurianiki, hau hawē kuxipayashū hawenabu judeubu hau hatu yusīkubaīshanunā. Habiaskari wakī Deusū bake Jesusū eari katutā hawē kuxipayawashū judeubuma anu eari yununiki, haburi ē hatu yusīriakubaūshanunā. ⁹Haskawē taeshū ē hawa pepamabiakē ewē nuikī Jesusū ea katushū ea yununi ē hatuki txanikī meshtāma nīkatā habu dukū Jesusū hatu katuni binuabu Tiago inū, Pedro inū, Joāonē ē haskamis txanima unātā ea haibuwakī nuku danāma ea inū Barnabébe ea habe metaka anibuki. Nuku haska wakī haibuwabu ea Barnabébe pashkakaī judeubuma anu nū yusī kaya hanua haburi hawenabu judeuburi hatu yusīnūbū hatube yubakatā nū ana dayai kaniki. ¹⁰Eska besti nuku yununibuki, nuitapaibu nū hatu hakimayamanūbunā, eā ma ē habiaska wabiamiskē ana nuku xināmakinā.

Antioquia anushū Paulō Pedro ha anikiaki, na hātstarā

¹¹Hanua Jerusalém anu nū itxaxina menetā ana Antioquia mae ewapakiri nū txītūkainima hiwekē habiatīari Pedro nukuki bai kaxīshū hatu yusīkī kaneaya ē ha bebūshū ha ani matu yuinū nīkakāwē. ¹²Ha dukū Pedro kashū judeubū beya unābiakī Tiagō haibuaiibu beriabumakē Jesus ikūwaību judeubumabetā pikubainaya habū judeubū beya

txibākī henekatsi isbuma Jerusalém anua bei ma hikiabū hatuki mesekī hau hakiri txakabu xināyamanūbū hatu beparani ana ikūwaību judeubumabetā Pedrō piama hatu heneyuniki. ¹³Hanushū Jesus ikūwaību judeubu betsa Antioquia mae ewapa anuabū judeubumabetā piaibukiri pe xinābiakī haska Pedrō kanekī taewai keska wakī habūri habiaskari wakī kaneriakubainibuki, ē haibu Barnabē dikabirā. ¹⁴Haska wakī Jesusū yusīa kayabi txibākī pewama kaneibu eā uīkī Pedro hawē haibuaibube nia hatu txitekī: “Pedroō, judeubia uatiā judeuma keskai mī hatube nishū pikubaīxinaki. Haskai natiā hatu beparani ana txītūkirā judeubū beya hau judeubuma mī hatu uīmatxakai? ¹⁵Nukubu na nenu mapuaburā, judeubumabū Deusū yunuti inū hawē nemati unābuma keskama judeubu kaītā nū yumeniki.” ¹⁶Habiaskabiakē Moisés yunuti inū hawē nemati txibaībuwē taeama tsuabūra Jesus Cristo ikūwaībuwē taeshū Deusū hatū txakabu buatā ana xināma nū unaiī. Nukūri judeubū beya nū txibaīwē taeama Jesus nū ikūwāyā nukū txakabu Deusū buashū nuku ma pepawani nū unāriaii. Jesus haibuwama judeubū beya besti txibaībū tsuabūra txakabuwai Deusū buashūki pepa waismaki.

¹⁷Hamē nuku ikirā, Moisés yusīa txibaī nū txakabu iyunībuki. Haskawē taeshū ē mia yuiairā, Cristōnā, nuku txakabu amaismaki, txanimarā. Haskakē nū pepakatsis ikī hatu unāti wamairā, hau nuku unāti wanunūbū Cristowē taea besti nū pepatirubuki. ¹⁸Ha inū, judeubū beya danākī henebiatā ana txītūkirā ē bena wairā, earā, ē txakabu ikeanaii. ¹⁹Haskakē Moisés kenenī txibāhairabiai earā, hawē taearā, ē mawa keska iniki. Haskawē taea Jesus Cristo mawaya ē habe cruzki dununi keskawē taea hatishūra ē hiweawē Deus duawai ē hiweshūyuaii. ²⁰Natiā na ē yurawē ē hiweyuairā, Deusū bakē ea abui ewē taea mawanishū ea xinā betsa wamani ha ikūwai ē hiweyuaii. Haskawē taea earā, ē ana emebi yunui ē hiweamaki. Hafia Cristo bestitū ea yunui ewē hiweyuikiki. ²¹Haska inū, Moisés kenenī txibaī ē pepa bestiaya Cristo hamē nuku mawashūkeaniki. Hafia natianā, ē ana haskamaki. Deus ewē nuiaya Cristō ea mekeawē taeshū ē shenipabū beya henetā Cristo besti ē txibākubainaii”, akī ē Pedro yusīniki, dasibitū nikaibunā.

Haratu yusīa pemē? na hātxarā

3 ¹Galácia anua unaīsmapa tatimabuū, tsuā matu dauīmēkaī, parā paepa wakinā? Jesus Cristō matu pepawanū ika cruzkia matu mawashunikiri ē matu unāmakubaībiaya huni betsabū hatū yusīa bena matu yusīkī parākubaīkanikiki. ²Haskakē na besti matu yukanū: Haskarawē taeshū Deusū Yushī Pepa mā binimē, Moisés kenenī txibākīraka? È yusīa Jesuskiri ikūwākīraka? ³Unaīsmaphairabuū, haskakī Deusū Yushī Pepa bikī taewabiyama hakimatā ana pepanū, iwanā, hunibū beya mā txibākubaīkanaii, kanekī txakabuairā. ⁴Hamē

Deusū kuxipa mā binimē? Mā haskayarā, ē harakiri xinātimaki. ⁵Deusū hawē Yushī Pepa matu ināshū hawara dami itimaska hawē kuxipawē hunibū atirubuma matu amakubaĩmistrā, haratu txibākī matu amamismē? Moisés keneni mā txibāmiswē taeshūraka? Haskamahairaki. Uĩrakāwē. Deusū hātxa nĩkakī mā ikūwaĩwē taeshū besti hawē kuxipawē matu amamiski.

Abraão pepakī ikūwaiā Deusū: Huni pepaki, anikiaki, na hātstarā

⁶Ē shenipabu inikiri matu yuinū nĩkakāwē. Abraõnē Deus nĩkatā ikūwaĩwē taeshū Abraõkiri hātšakī Deusū yuikī: “Huni pepaki”, aniki. ⁷Haskakē tsuabūra Deus ikūwākī Jesus txibāmisbu Abraõnē bababu kayabibuki. ⁸Hanua judeubuma dikabibū hatū xinā betsa watā hatū txakabu henetā Jesus ikūwāshanaibuwē taeshū Deusū unākī hawē hātšxa yuishunika Deusū Yushī Papatū Abraão kenemashūkī yuikī: “Deus mĩ ikūwaĩwē taeshū yura shukua tibibu dasibibū hawē bake ikūwaĩbu hiwekuĩmakī Deusū miwē taeshū hatu duawashanikiki”, aniki. ⁹Haskakē Abraõnē ikūwāyā Deusū duawani keska wakī tsuabūra hawē bake ikūwaĩbu Deusū duawariamiski, hiwekuĩmakinā.

¹⁰Hanushū Deusū hātšakiri hawenabu Moisés yuikī: “Hawē yunuti inū hawē nemati ē matu keneshunai tsuabūra dasibi txibāhairabumakē Deusū hatu yupukī pe hiwemama ishanikiki”, haska watā hatu keneshuniwē taea txibāmabia hatūmebi pepapaikī hawē yunuti inū hawē nemati txibāpaikī pewabumakē Deus hatuki sinatamakī yupushanikiki. ¹¹Haska inū: “Ikūwaĩ pepabu hiwekuĩshākanikiki”, iwanā, Deusū hawē hātšxa yuishunika kenemaniwē taeshū hawē yunuti inū hawē nemati besti txibākī Deus daewatirubumaki, nū unānā. ¹²Hawē yunuti inū hawē nemati Deusū Moisés ināni txibaĩnā, hawē hiwea kayabi Deus anua bitimaki. Hakia Moisés yuikinā: “Tsuāra Deusū yunuti inū hawē nemati txibākubaini ha yusīa hātšxawē kaneama hawē hiweshanikiki.” ¹³Deusū hawē yunuti inū hawē nemati yunukinā, hawē yupukunākatsi aniki. Hatū nukū txakabuwē nuku yupubiaya Cristō nuku meshpamanū ika nukū txakabu kupiti bi nuku mawashuniki. Haskai kaikiri bebūkiri Moisés yuikī: “Tsuara hatū txakabuwē taeshū tenākī hiki netābu mawaya Deus hawē nuiama yupumiski”, iniki. ¹⁴Haskawē taeshū haska Deusū Abraão duawakī pepa yubani Jesus Cristowē taeshū judeubumāri mā ikūwāyā Deusū Abraão yubaniwē taeshū hawē Yushī Pepa Deusū ma matu ināni dasibi mā ma hayaki.

**Haska Deusū Moisés yununi inū Abraão yubani
Paulō haska hatu yuinikiaki, na hātstarā**

¹⁵Ē betšabu inū ē puibuū, haska yurabu yubakai xinaĩ hātšxamisbu keska matu yuinū nĩkairakāwē. Yurabu yubakanametā xināma tsuā

henetiruma inũ tsuã betsa watirumaki. ¹⁶Na haska ẽ shenipabu Abraão Deusũ yubakinã, hawẽ baba bestitxaikiri aniki. Hakiri kenekĩ hawẽ bababu itxapakiri yubakai hãtxama hakia ha haska hawẽ baba bestitxaikiri yui yubakairã, Jesus Cristokiri iniki, nukubũ ha nũ ikũwãshanũbũ nuku anu hushanai yubakinã. ¹⁷Hanua ma ana 430 bari kaya hawẽ yusĩa Moisés yuibia dasibi Deusũ Abraão bebũkiri yubani maewamakĩ txipu Moisés hawa betsa wamama iniki. Haskakẽ hawara Deusũ Abraão yubani hawa betsa wama ashũkubaĩshanikiki. ¹⁸Haska inũ, Moisés yusĩa txibaĩ nũ pepaya hawara Deusũ Abraão yubani mã hawama ikeanai. Natianã, haskamaki. Deusũ Abraão yubanirã, tsuã betsa watirumaki.

¹⁹Haskakẽ haska Deusũ hãtxa Moisés yununirã, matu yuinũ nĩkakãwẽ. Kanekĩ haska habũ txakabu waibukiri hau shabakabi unãnũbũ Deusũ hawẽ yunuti inũ hawẽ nemati Deusũ hawẽ nai tsumabu Moisés yuimakubainiki. Haska bebũkiri Abraão hawẽ baba betsakiri Deusũ yubani huriamakẽ hau Moisés yusĩa txibãkubainũbũ yurabu hatu yusĩkubainibuki. Deusũ nai tsumabũ hawẽ yunuti Moisés yuimabiakubaĩshanai ²⁰ha dukũ Deus Abraão yubakakĩ ibubis Deus bestitũ anikiaki, tsua hãtxashunamarã.

**Deusũ Moisés yusĩnirã, Cristowẽ taea nuku
ana hawẽ mekeamakiaki, na hãtxarã**

²¹Ha dukũ Abraão Deusũ yubani inũ ana ha katxu Moisés yusĩmanirã, haska ha dukũ Abraão yuini Deusũ betsa wakĩ nematirumẽ? Haskamaki. Deus daewakĩ hawẽ nemati inũ hawẽ yunuti hãtxa pe txibãkubaikĩ tsuabũra hiwekuĩa bikeãkanai. ²²Deusũ hãtxa Moisés keneni uĩkĩ dasibibũ txakabuwakubainaibukiri ibubis unãbiai pe hiwetirubumakẽ haska Deusũ hatu yubani Jesus Cristo ikũwãmisbũ besti hiwea kayabi bishãkanikiki.

²³Nũ ha ikũwãshanai huriamakẽ Deusũ Moisés yusĩa keneniwẽ hawẽ nuku bitxikĩ akawashũ nuku tea wayuniki, hawẽ taeshũ Jesus Cristo manakakĩ nũ hawẽ unãti wayunũbunã. ²⁴Haska inũ, Cristokiri unãkĩ ikũwãkĩ nũ txibaĩbu nukũ txakabu buatã hau pepabu keska Deusũ nuku washanũ, iwanã, hawẽ yunuti inũ hawẽ nematiwẽ nuku mekeyukubainiki. ²⁵Hakia natiã nũ Jesus ikũwaĩbu habias yunuti inũ nematiwẽ nuku ana tsumamakẽ ²⁶dasibi mã Jesus Cristo ikũwaĩ mã ma Deusũ bakebukẽ hatũ besti matu mekekubainikiki. ²⁷Haska inũ, mã Cristo ikũwãkĩ hatu unãti wamanũ ikaya matu naximabu mã tari sawemis keska wakĩ Cristoki dasikĩ mã ma tari sawekĩ akawaniki. ²⁸Haskai mã yura bestitxai keskaki. Judeubu kasmai judeubuma inũ, tsumayabu kasmai tsumabuuma inũ, hunibu kasmai aĩbuaibu xinãma hakia mã Jesus Cristo ikũwaĩbu besti dasibi mã yura bestitxai keska

mã haki dasia xinākubaikāwē. ²⁹Mã Cristonaburã, habia mã Abraõonẽ bababu dikabiwẽ taea haska Deusũ Abraão yubaniwẽ maturi hawenabui mã hiwea kayabi hayariashanii.

**Nũ ana dayaru escravo keskama nũ ma Deusũ
bake kayabibukiaki, na hãtxarã**

4 ¹⁻²Na miyuiwẽ ã matu yusĩkatsis ikaii. Huni betsa huni bakeya hawẽ ibu mawakĩ hamapai xarabu haya hawẽ bake heneshũbaĩmsibuki. Hakia hawẽ bake ewariama hawenabũ yumewaibũ huni betsã hawẽ epã mabu mekeshũyuabu hawẽ epã mabu inũ dasibi hawẽ hamapai xarabu hamebi hawẽ bakẽ ibuwaitiã hawẽ epã hanu yuini kemariama ha hawẽ bake ewatã hawẽ mabubia ibubis hawena wariamawẽ taea dayaru escravo nuitapai keskai hiweyumisibuki. ³Haskakẽ nukuri bake mixtĩbũ xinã keska nũ ewariama keska hunibũ yusĩawẽ inũ hatũ beyawẽ nuku mekenibuki. ⁴⁻⁵Deus yubakakĩ hanu hawẽ bake yunutiwani menekĩ Deusũ hawẽ bake yunua hua aĩbukia kaitã Moisés yusĩniwẽ yumetã hatũ Moisés yusĩni txibãkĩ ha yurabu hawẽ mekeaihu hatũ kupiti nuku bishuãyã txanima kayabi Deusũ bakebu benimai nũ pepashanũbũ hawẽ bake shabakabi dami watã tashnimaniki. ⁶Haska inũ, nũ ma Deusũ bakebukenã, Deusũ hawẽ bakẽ Yushĩ nukũ huĩti merã yunua Deus hatũ nuku kenamakĩ: “Ë Epa nuikipatuũ”, nuku amamiski. ⁷Mã haskaya ana Moisés yusĩawẽ mã dayaru escravo keskama ikis mã Deusũ bake kayabiki. Haska inũ, Deusũ duawakĩ hawẽ bakebu wakĩ hiwea kayabi matu inãkuĩshanikiki.

Paulo ikũwaĩbuwẽ nuinikiaki, na hãtxarã

⁸Uatiã Deus kayabi unãriama matũ mekenã dami yushĩ betsa betsapa kēwai hatũ escravo tsuma mã inibuki, haskatimabiakenã. ⁹Hakia natiã Deus mã unã bestima Deusũri duawakĩ matu unãriaikiki. Haska unãbiakĩ ana txĩtũkirã hawãra matu pepawatirubuma txibaĩ mã ana hatũ dayaru escravo ikatsis ikimēkaĩ? ¹⁰Hawẽ pepanũ, iwanã, Moisés yusĩa txibaĩ judeubũ besi betsa betsapa mã imiski, hanu nawatitiã inũ, ushe benatiã inũ, uitiã inũ, baritiã inũ, bari benatianã. ¹¹Mã haskawẽ taea hamẽ dayakĩ ã matu merabewama ikimamēkaĩ? ika ã dateaii.

¹²Ë betsabu inũ ã puibuũ, matu Jesus ikũwãmakĩ taewamai judeubũ beya txibãma matũ beya txibaĩ ã matube hiweyuniki. Ea nĩkakãwẽ. Natiã ã hiwemis keskariai hiwekubaikãwẽ, ã matubetã hawa txakabu waismawẽ taearã. ¹³Haskakẽ matu yusĩkĩ ã taewaitiã isĩ txakabũ ea atxia ã nuitapaya ¹⁴ã yura ã isĩ tenei atimapakĩ matu unãti wamabia mã ea hawa danãma Deusũ nai tsuma keska ea wai ewẽ benimai Jesus Cristo kayabi keska wakĩ mã ea duawaimaki. ¹⁵Hanushũ matũ beru ã matu ea akaya ea merabewanũ, iwanã, matũ beru tsekashũ mã ea

inākeanimabuki. Ea haska wai mā benimakubainimawē taeshū haskai mā ana haskamamē? ¹⁶Hātxa txanima ē matu shabakabi yuiaiwē taearā hawai ē ana matū haibumamē, natiā mā eki sinatakūkainairā?

¹⁷Haskakī Jesus ikūwāi matxupabu huīti txakabuyabū judeubū beya matu txibāmakatsis ikī tari matu pashkanū, iwanā, matu hawenawakī habū yusīa besti matu txibāmakī hawē tsumabu matu wakatsis ikanikiki. ¹⁸Hakia itxapabu merabewakī mā hatu pe mekeaburā, haskarā, pehairaki, ē matube hiweshū ē matu yusīa xinākī mā amis keska bestima heneama hatu ashūkubaīkāwē. ¹⁹Ē bake keskabuū, haskakī mā ana ea bika tenemai? Cristo matu ikūwāmakī ē matu merabewaya mā ea ani keska wakī mā ana ea bika tenemai, aību bake kaī isī tenemis keska ea wakinā. ²⁰Haskarara mā xinaī ikai ē matu unāmaki. Hamē natiā ea kayabis ē harirā, haska ē xinaī hātxa pewē ē matu yui kapanā ē katirumaki.

Agar inū Sarakiri unātikiaki, na hātcharā

²¹Moisés yunuti inū hawē nemati mā bemakis txibāmisbuū, Moisés yusīa mā nīkaisbumamē? ²²⁻²³Hakia Moisés keneni uīkī ha Abraōnē huni bake Ismael inū Isaquekiri nū uīmis matu yuinū nīkairakāwē. Abraōnē aī Sara hau dayashūkūkaīnū peiwē Agar bikī hawē dayaru escravo wabianishū hanubi aīwāriatā haki Abraōnē bakewa hawē bake Ismael hawē yubakati hayama kaīnikiaki. Hakia Abraōnē hawē aī Sara peiwē bima aī kayabi wani Deusū merabewaya Sara yushabuhairabiakē hawē bake Isaque haki bakewaima kaīrianikiaki, haska Deusū Abraō bebūkiri yubani meneirā. ²⁴⁻²⁵Abraōnē aī betsa escravo Agarrā, haskakiri yuiarā, ha aību escravo Mati Sinai Arābia mai pakea anu keskaki. Ha mati anushū Deusū Moisés yusīkī hawē yunuti inū hawē nemati inānikiaki, hau keneshanunā. Habū nīkatā yubakai: “Ha Deusū yunuti inū hawē nemati nū txibāshanai”, iki Israelbu Deusbe yubakai hātshanibukiaki. Hanushū Agar escravo ini keskakī habū ha yunuti inū nemati Moisés keneni txibāmisburā, escravo keskabuki. Jerusalém anu hiwebiabu Mati Sinai hatū ewa keskaki. ²⁶Hakia nukuburā, nū Deusū bake kayabibuwē taea Jerusalém nai anua nukū ewa keskaki. Deusū nuku mekeawē taea nū escravō bakemaki. ²⁷⁻²⁸Ē betsabu inū ē puibuū, matuburā, Deusū Isaque yubani mā ha keskabuki. Deusū bake kayabiburā, mā hawē yuba hayaburiki. Haska inū, Deusū hātxa yuishunika Isafāsī yuikī:

“Bake bisma mā nuitapabiai baba hayakī
aībū bake bimis mā binumashanai.

Haskakē habū mā bake bitiruma benimahairakubaīkāwē.

Bake bi isīmisbu keskai mā isī teneisma mā unaiī.

Ha inū, betsarā, beneyabia matū benē matu henebaina

bake itxapa bikī ha beneyabu mā hatu binumariashanaii, bakeyakinā. Haska xinākāwē”, atā keneniki. ²⁹Hakia hawē escravō bakē Deusū yubakī bake ināni Isaque Ismaelī itxakawani keska wakī natiāri Deusū Yushī Papatū daya nū akai Moisés yusīa bemakis txibaībū nukuki sinatakī nuku ibu wakī escravo wanū, iwanā, nuku itxakawariakanikiki. ³⁰Hakia hawara Sarā Abraão yuini Moisés nuku keneshuni matu yuinū nīkakāwē: “Isaque besti ē bakekē mī dayaru escravō bake ē bakebe ewatā nū mawaya hau nukū mabu biama ishanū menā Agar inū Ismael hatu nitxīriwe”, akī Sarā Abraão yunukī yuiniki. ³¹Haskakē natiā ē betsabu inū ē puibuū, Moisés yusiawē hawāra nuku ibu wakī amamisrā, hawē escravo keska ana iyamakāwē. Hakia escravo keskama Abraão hawē bake kayabi yubani keska ikubaikāwē, tsuā tsumamarā.

Jesus besti txibaī txītūtimakiaki, na hātstarā

5 ¹Haska inū, Moisés nemati inū hawē yunuti nū ana txibāyamanūbū Cristō nuku kaīmaniki, Moisés yusīa txibaī nū ana hatū escravo iyamanunā. Matu haska nemanikē Jesus besti txibaī ana xinā betsa wama judeubū yusīa danaī ana hatū dayaru escravo iyamakubaikāwē.

²Haskakē hawara ē Paulō ē matu yuiāi nīkairakāwē. Ha dukū judeubū hatū beya matu txibāmakī matū hina kubitxi matu meshtematā hanushū Jesus matu ikūwāmaiburā, hamē Cristo nuku mawashuni mā hamē ikūwākanaii. ³Ana matu shabakabi yuinū ea nīkakāwē. Tsuabura judeubū hatū beya matu txibāmanū, iwanā, Moisés yusīniwē matu nīkamas kemumakī matū hina kubitxi matu meshtemaiburā, haska Moisés yununi inū nemani mā hawē pepakatsis ikairā, hatubetā haska besti menekī txibākubaikāwē.

⁴Haska Moisés yusīa txibaī pepanū ika txītūkirā Deus matuwē nuini pepa danaī Cristo henei mā hawenabumaki. ⁵Hanua nukunā, Jesuski dasitā nū ikūwaiwē taeshū Deusū Yushī Papatū nuku merabewaya Deus kaneismatū nukū txakabu nuku buashuniwē pepai nū habe hiwekuīshanai hawa teama nū manayukubainaii. ⁶Haska inū, Jesus ikūwākī hina kubitxi meshteaiibu inū meshteabuma hamē ikanikiki. Hakia Jesus Cristo ha besti ikūwai nui benimai nū haki txiti ikubainaiibu besti nū hawenabuki. ⁷Haskakē hātixa kayabi mā nīkahairakubainaya parākī tsuabū ha hātixa txanima mā txibāyamanūbū matu nemakubaikanimēkaī? ⁸Habū matu paraībū hatū yusīanā, Deusunamaki. Deusū matu katunitū haska hātixa matu yusīsmaki. ⁹Hakia misi wakī hawē shasha wati eskarabes kapā aka shashai keskai tsuabūra txani hātixa eskarabes xinākī txibākī ha katxu txani hātixa mirima txibāshākanikiki, Jesuskiri ana xināmarā. ¹⁰Haska yunukī ē matu keneshunai uītā habiaskari mā ikūwāriakubaīshanai Deus ē ikūwaii. Hamē tsuabura

mapushū matu xinā betsa wamakī habuã matu itimaska waiburã, Deusū hatu unãtã kupishanikiki.

¹¹Mã ã betsabu inū ã puibuū, hunibu dasibibū hau hatū hina kubitxi meshtenūbū ã hatu yusīmiswē taeshū ea itxakawama ikeãkanaii. Hafia eã yusīkinã, Jesus huni txakabu keska cruzkia mawani ã hatu yusīamakē ea danābumari ikeãkanaii. ¹²Haskakē judeubū beya txibākī huni betsabū hina kubitxi matu binū, iwanã, yusī mapushū matu bikawaiburã, hatū hina hirabi hau meshte keyurianūbūwē.

¹³Ë betsabu inū ã puibuū, mã judeubū beyauma hawama mã hiwekubainūbū Deusū matu katuniki. Haskai hiwekī matū yura meke txakabuwama nukunabube duanamei hatube nui merabenamekubaikāwē. ¹⁴Ha inū, Deusū hawē nemati inū hawē yunuti Moisés nuku yusīmakī itxawani matu yuinū nīkairakāwē: “Mimebi mī nuimis keskawē huni betsa nuitapai hawaumawē nuikī hatu merabewakubaikāwē”, iwanã, Deusū Moisés kenema nukū shenipabu nuku yusīshuniki. ¹⁵Hafia yuinaka hawē betsabe keyunamekī tenã keyumis keskakī, maturã, ikūwã betsabube mã binūkatsis iki yuānanaī maturi mã beshtekei yamatirubuki. Pe mekekī uīrakubaikāwē.

Deusū Yushī Papatū nuku mekekubaīmiskiaki, na hãtxarã

¹⁶Eska ã matu yusīmis ana matu yuinū nīkakāwē. Hawara Deusū Yushī Papatū matu yusīa nīkatã haskai besti pepai hiwekubaikāwē. Hamē haska xinã txakakī matū yurã haska abuai matu amanū, iwanã, yunuaiwē matūmebi txakabukī xināyamakubaikāwē. ¹⁷Hafia hawara txakabu mã abuai Deusū Yushī Papatū danāmiski. Haska inū, hawara hawē Yushī Papatū abuai txakabūri danāriamiski. Ha dabe binunānaibū maturi pepapaikī haratura mã heneama mã kanemiski, ibubisrã. ¹⁸Hafia Deusū Yushī Papatū besti ma matu mekeaya Moisés yunuti inū hawē nematiwē Deusū matu ana hawē mekeamakī.

¹⁹Haska inū, heshe txakabu banabu txakabu hukūmis keskai tsuabura txakabū hatu mekea habū akī shabakabi txakabuwakubainaibu hatu uītirubuki, hatū kemu txakabuwē aībuaibube inū hunibube txutanamekinã, atimapa betsa betsapa beya wakinã. ²⁰Haska inū, yushī txakabu kēwākī hawē kuxipawē daunānākinã, yurabu hãtxaibu hatu nemakinã, kūyã ikirã, hawenabuwē nuiamarã, hawara betsa hayawē taeshū hatu binūkatsis ikī danākinã, yura betsabuki hawaira sinatakinã, hatuki ha ikī hatu sa akī keyukinã, ibubis hawara pepa bikī xinã betsa betsapa wai hiweabuki. ²¹Haska inū, hawara tsuara betsa haya binū, iwanã, hawē kemuirã, beyuskī nushuti paepa aki paeinã, pikehaira bestinū ika yushī betsa kēwãī nawakī hamapai txakabu betsa betsapa wamisbu hanu Jesus huaitiã ha yura haskabu habe buama ishākanikiki. Haskakē bebūkiri bari betsatiã ã matu yusīkī yuima: “Hamapai txakabu

betsa betsapa akaibu dūkekubaikāwē”, iwanā, habiaskari ē ana matu yunuaii.

²²Hamē betsarā, heshe pepa banabu pepa hukūmis keskai tsuabura Deusū Yushī Papatū mekeshū amakī hatu pe hiwemabainairā, eska shabakabi hatu anua tashnimiski, abunamei hawenabuwē nuirā, benimakī Deus kēwaīnā, unānuma hiwea tsuki sinatamarā, hī hī ikama hawara teneirā, hatu txikixwabu kūyā akamarā, hatu duawairā, yauxiama hawara pepa hatu inākubainirā, hawara yubakashū kaneama akirā, ²³babutā hātxaisma inū shetxakaismarā, hamebi hawē yura pe mekemisrā. Mā haskakūkainaiwē taeshū Moisés yusiawē tsuā matu hawa nematirubumaki. ²⁴Hakia Jesus Cristo cruzki mastabu mawani keska wakī nū Jesus ikūwaiibu nukū txakabu itxawatā Jesusbe cruzki nuku mastashunibu keskaki, ana txakabu nū meyamanunā. ²⁵Haska inū, natiā Deusū Yushī Papatū nuku hiwemaiwē taeshū hawara ha bestitū nuku yunukī amai nīkatā hiwekubainākāwē.

²⁶Haskakē nukuburā, ibubis keāma betsa binūkatsis ikama hawara yura betsā bimiswē kemuama inū hawē nuiama hiwekubainākāwē.

Merabenākūkaītikiaki, na hātstarā

6 ¹Ē betsabu inū ē puibuū, nukunabū hamapai txakabuwakī kaneaibu uītā matū mā ikūwaiwē taeshū pewakī hatu merabewakī hātxa pepawē unāshubira hatu yusiakubaikāwē. Hakia matūri txakabuwakī mā kaneyamanūbū, Deusū Yushī Papatū matu mekeaya ibubis mekeriakubaikāwē. ²Haska inū, matunabū shākama iabiranaibu mā hatu merabewamis keska wakī tsuabūra hawara bika teneaiibu inū tsuabūra kaneaibu hatu merabewariakubaikāwē. Hatu haska wai haska Cristō nuku yusiakubaini keska ashūkī hawē hātxa mā meneshūshanaii.

³Haskakē tsuāra hatu merabewamis xinaī hawē pepakiri hātksamisburā, kanei keī ibubis parananāmisbuki. ⁴Hakia hatiritū kēkī kanekatsi ikama pepa akubaīmis unākī yuikī: “Ē pepaki”, iwanā, yura betsa binumanū ishū xinātimaki. ⁵Hakia tsuāra habū bika betsa betsapa mā tenebiarā, has xināma tenekubaikāwē. Habiaskas nū haya Deusū unaīkiki.

⁶Haska inū, tsuabūra matū yusinā Deusū hātxa matu yusiāibu mā habu nīkaibū matū hawara mā haya, piti inū mabu inū peirā, ha pashkatā matū yusinā huni hatu inākubaikāwē, merabewakinā. ⁷Haskakē txanima hātxa matu yuinū nīkairakāwē. Hamapai wakī Deus nū parātirimaki. Hawara nū amiswē taeshū Deusū kaneama nuku kupishanikiki.

⁸Tsuabūra ibubis txakabu xinākī kanemisbu Jesus ana huaitiā Deusū kupikī mawatxakamakī hatu isī tenemahairashanikiki. Hakia tsuabūra Deusū Yushī Pepa nīkakī kanebiatā hawē yusiā txibākī heneabumakē Jesus ana huaitiā Deusū hatu hiwekuīmashanikiki, ikibi imakinā.

⁹Haskakē pepakūkaikī heneyamanākāwē. Hatiara Deusū hanu kupiaitiā

merabenãkĩ pepawakubaĩkĩ nũ heneamakẽ Deusũ duawakĩ pepawẽri nuku kupishanikiki. ¹⁰Haskawẽ taeshũ hawara nũ hayawẽ dasibi nukubetã ikũwaĩbu nuitapaibu hatu merabewakubainãkawẽ, ha katxu betsaburi ikũwãriabuma hatu merabewariakinã.

Hawẽ henekĩ hãtxa hatu kenekĩ keyushunikiaki, na hãtxarã

¹¹Hawẽ keneti mebĩtã ibubis matu keneshũkĩ kene ewapabuwẽri ẽ akai uĩkãwẽ.

¹²Hi cruzkia mawakĩ nukũ txakabu Cristõ buaniki, haska hari hãtxakatsi ikama ha yusĩnanaĩ parananaĩbũ hau judeubũ hatu dakewakĩ danãkĩ hatu bika tenemayamanũbũ ishũ hau hatukiri pe xinãnũbũ, iwanã, nĩkamas maturi hina kubitxi meshtekatsis ikanikiki. Hatu uĩrakãwẽ. ¹³Haska inũ, Moisés nemati inũ hawẽ yunuti habũ txibãkĩ keyuamabia matũ hina kubitxi nĩkamas matu bitã matuwẽ taea besti ibubis kẽkatsis ikanikiki. ¹⁴⁻¹⁵Hanua tsuabũra hau Deusũ ea duawanũ, iwanã, hatũ hina kubitxi meshtekinã hamẽ akanikiki. Haska inũ, tsuabũra meshteamã hamẽri ikanikiki. Hakia nukurã, Deus duawanũ ika xinã betsa watã besti Deus nũ benimawakubainaii. Jesus ea mawashuniwẽ taeshũ xinã benawatã: “Mabu itxapa besti binũ”, iwanã, ana ẽ xinãmakẽ txakabũ ea ana atxiamariki. Haskakẽ keãma nukũ Shanẽ Ibu Jesus Cristo hi cruzkia mawashũ hawara ea ashunikiri besti yuikubaĩkĩ Deus ẽ kẽwaĩ. Ẽ hawauma iniwẽ taea ẽ hawa kêtirumakĩ. Hakia Jesuswẽ taea besti ẽ kêtiruki. ¹⁶Haska ẽ matu yuiã keska xinã betsa watã Jesus besti ikũwaĩ mã hawẽ dasibi hiweaibu txanima mã Deusunabu kayabiki. Hanua Deus matuwẽ nuikĩ hau unãnumã matu hiwemariakubainũwẽ.

¹⁷Jesuski dasinishũ hakiri ẽ yusĩkubainaya ea itxakawakĩ detekĩ ea baka keshtuwakeakenibuwẽ taeshũ ẽ yusã ea yuãkĩ ana ea bikawayamakãwẽ. ¹⁸Ẽ betsabũ inũ ẽ puibuũ, nukũ Shanẽ Ibu Jesus Cristõ hau matu duawakubainũwẽ.

Hatiski, ẽ hãtxarã.

Paulo